

Ikalaata ilya wubhili ilya

## Yookhani

### Uwandilo

Umusundikwa uYookhani ásimbile ikalaata ili ifupi ku shibhanza. Ishibhanza shiniishi akushitekha itaawa ilya mwantanda umupiti. Mwi kalaata ili akubhalajizya aBhakilisiti kutinikha indajizyo ya Yeesu ye yikuti bhagananaje. Khabhili akubhasokha kuti bhamanye imanyizyo izyi lenga, ni manyizyo izya wanalyoli uwa Yeesu Kilisiti. Mu zyonti zye bhakwimvwa bhawulandataje uwanalyoli.

### Uwandilo

<sup>1</sup> Ine ne musongo uwa shibhanza, inkukusimbila iwe wumwantanda umusaabhuwa, peeka na bhaana bhaakho bhe imbaganile ku wanalyoli. Te neene numwene ne imbaganile, lyoli na bhanji bhonti bhe bhawumanyile uwanalyoli, bhoope bhabhaganile ku wanalyoli. <sup>2</sup> Tubhaganile kunongwa ye itwe nimwe tuwumanyile uwanalyoli, khabhili tutijendeelele kuwumanya wiila na wiila.

<sup>3</sup> Utaata umulungu nu Mwana waakwe uYeesu Kilisiti, bhatitulolele uwiila ni shisa, na kuutupa uwutengaanu, mu wanalyoli, na mu lugano.

### Uwanalyoli nu lugano

<sup>4</sup> Násesheeye nhaani, we nimvwa kuti abhaana bhaakho bhamu bhakwikhala mu wanalyoli, anza she uTaata umulungu átulajiziizye. <sup>5</sup> Ishi, iwe maayi umuganwa, mu wusimbe uwu, inkukulaabha kuti utinikhaje indajizyo yiila ye yikuti tugananaje. Indajizyo

yiniyo, te mpwa khaala, lyoli yi yiila ye twámile nayo kufuma pe twítishile.\* <sup>6</sup> Kuganana kwe kuti, twikhalaje kulandatana ni ndajizyo zya Mulungu. Indajizyo ye mwímvwizye kufuma kuwandilo yikuti mugananaje.

*Mutabhaposheelaje abhakhopeli*

<sup>7</sup> Inkulonga shiniisho kunongwa ye abhakhopeli abhinji bhafumiiye mu nsi, bhe bhatakwitikha kuti uYeesu we wu Kilisiti, áyinzile akhabha nu mubhili anzu muntu. Umuntu we akulonga shiniisho, mukhopeli, kabhili mulugu wa Kilisiti.† <sup>8</sup> Mubhe amiiso na bhanaabho, imbombo yiinyu yitakhateje ulwa khasa, kuti uMulungu akhaabhape vwe vibhakhondeeye ku mbombo yiinyu. <sup>9</sup> Umuntu wowonti we akugalulanya imanyizyo zya Kilisiti, kabhili atakujendeelela kulema ziniizyo zye bhamumanyiziizye, wunuuayo atali nu wupeeka nu Mulungu. Heelo, wowonti we akujendeelela kulema imanyizyo, ali nu wupeeka nu Taata uMulungu, nu Mwana waakwe. <sup>10</sup> Inga umuntu akwinza kukwinyu we atakumanyizya imanyizyo ziniizyo izya Kilisiti, mutakhamuposhee mu nyumba zyinyu, kabhili mutakhamulamushe ngati Mukilisiti wamwinyu. <sup>11</sup> Wowonti we akumulamukha, ali peeka nawo mu mbiibhi zye akubhomba.

*Indamukho izya kumaliilizya*

<sup>12</sup> Indi na mazwi aminji ge nanzaga kubhasimbila, ileelo intakwanza kusimba genego mwi kalataasi nu wiino. Lyoli inkusubhila kwiza kukwinyu kubhayaatila inga tukhalonje we twalolana, pe tukhayiseshela nhaani.

---

\* 1:5 1:5 Bhaazya Yookhani 13:34. † 1:7 1:7 Umulugu wa Kilisiti kwe kuti we akudindanjila imbombo ya Kilisiti.

2 Yookhani 13

3

2 Yookhani 13

<sup>13</sup> Abhaana bha yilumbu waakho nu lwitikho  
umusaabhuwa, bhakukulamukha.

ULufingo uLupwa ku ndongo iya Shimalila  
Malila: ULufingo uLupwa ku ndongo iya Shimalila (New  
Testament+)

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 13 Jun 2022

3aa8e7a3-f258-5182-ab3f-fbc6f725bb06